



Орган Лемковского Союза.

Пренумерата в краю:
 30 грошей місячно,
 80 „ квартално
 1.50 „ полрочно,
 3 зл. рочно.
 В Амерыці: 1 дол. рочно.
 В Чехословакии:
 2 кор. місячно, 10 кор. полрочно,
 20 кор. рочно.
 Конто чекове Нр. 404.155.

Выходит в каждый четверг.

Редакция и администрация в Крыници. — Адрес „Лемко” Крыница.

Всіх читателєй, котры не вплатили ище пренумераты, просиме выровнати якнайскорше рахункы.

Также просиме присылати членскы вкладки до Лемко-Союза.

Взддержати ся с купном календарей!

Уж тепер напыхають нашим людям ріжны видавництва свои календары на 1936 рок. Без замовлень присылають они для роспродажи календары до кооператывов, читалень и свідомых одыниц, котры найчастійше тоты календары роспродають лем прото, жебы не мати клопоту с тым, кто их прислал. Таким способом встрічат ся по селах календары, в котрых єст дуже написане о цілом світі, але ніт ничого о житю того села и тых людей, котры тот календар купили. А преця найдорозша каждому с нас єст наша хата, сусіды, наше село и поблизкы села и міста. Тото, што діє ся у нас и в поблизкых, знаных нам селах и містах, интересує нас все найсильнійше, бо там маме знакомых и родных нам людей. Тому то и календар, выданий нарочно для малой группы людей, для одного региона, може найсильнійше заинтересовати каждого читателя, бо в нем найде он всьо взяте с єго жита, як бы с єго хаты, с єго родины. Таким календарем для лемков єст календар „Лемка“, котрый буде ся розсылати в початках грудня. Тож не принимайте инших, насыланных вам на силу календарей, але дождийте на свой календар, котрый треба замовляти уж тепер в редакции „Лемка” в Крыници.

Фронтом до села.

В четверг, дня 24. жолтня т. р. отбыло ся перше засіданє другой под ряд сесии Сейма. В засіданю приняли участь члены Правительства. Сейм тот скликано для ухваленя

закона о полномочиях до выдаваня Президентом Річипосполитой декретов с силом законов в ділах финансовых и господарчих до дня 15. сїчня 1936 р.

В засіданю том забрал голос председатель Рады Министров, Мариян Зындрам-Косцялковский, котрый в долшой бесіді высказал потребу ухваленя полномочий, а также представил програму труда и намерень теперешного правительства.

Бесідник подчеркнул конечну потребу удержаня равновагы бюджета и представил в загальных чертах, якыма дорогами Правительство намірят усунути дефицит и довести до поднесеня экономичного положеня краю. Погодивше забрал голос министр финансов инж. Квятковский, котрый оговорил подробно экономичне положенє и подал средства, яких правительство ужие, штобы осягнути бюджетну равновагу.

Як с тых бесід видно, програма экономична Правительства операт ся на удержаню сталой валюты. Операючи ся на том основаню, доберат ся такы средства, котрыма багне Правительство осягнути экономичну поправу.

Найважнійши с тых средств сунт:

- 1) безотложно допроводити до равновагы бюджета через ошадности и подвышенє податков от тых, котры маот аж и невеликы доходы.
- 2) не покрывати дефицита пожичками.
- 3) облегчити рольництво через обниженє данин самоуправных и акцию отдолженьову.
- 4) поменьшати кошты за перевоз товаров, а особенно рольных продуктов желізницами, т. зн. обнижити тарыфы желізно-дорожны и поменьшати оплаты с тытула убезпечень социальных.
- 5) Поменьшати ріжницу медже цінами за рольны продукты и за товары промисловы через обниженє картельных цін.

Єст в той програмі Правительства добра воля облегчити положенє хлопа на селі, бо

коли на другых на другых накладат ся тягары (подвышенє доходowego податку, обкроснє пенсий урядникам и т. д.) то сельским господарам має обнижити ся о половину додаток самоуправный до податку грунтового, усталити границу для дороговых оплат и заказати містам брати оплаты за вїзд до міста и на торговицу (торгове). Понадто має правительство обнижити ціну товаров промисловых, картельных, што также отобе ся користно на господарчом житю села.

С фронту италиянско-абисынского.

За минувшу неділю не змінило ся нич на фронтах военных в Африці. Ту и там малы столкновєня, а поза тым спокой и тишина. Обі стороны зберають силы до новых боєв, котры віроятно начнут ся скоро. Дня 28. жолтня, в день 13-той рочницы фашизма в Италии, италиянскы войска предприняли на всіх трох фронтах марш в глубину Абисынии.

На полночном фронті

мают росоградити ся найтяжши бои. Италианы машеруют в напрямі міста Макалли, где прийде віроятно до завзятых боєв, бо абисынчики громадят там великы войска. На разі италианы идут наперед, не встрічаючи нигде наименьшого упора. В Аддис-Абебі числят ся однак с переламанєм абисынского фронта под Макалли и начальство абисынске приготавлият другу оборонну лєнию недалеко Макалли.

На фронті полночно-веходном

положенє не змінило ся поза тым, же италиянскы войска подняли марш вперед.

То само єст и

на фронті полудневом,

где колюмны италянскых войск посувають ся поволи vzdolж рікы Веби-Шебели. Живу акцію ведут ту самолетны ескадры, бомбардуючи спостережены кватеры абисынскоґо военного начальства.

Цисар летит на фронт.

Абисынскый цисар має в тых днях отлетіти самолетом на фронт, штобы лично слідити за положенєм. Одному с амерыканскых газетарей заявил, же задержит ся долше там, где будут найзавзятійши бои.

„Так, як тото зробил бельгийскый король Альберт, котрый выіхал на фронт, коли на зго край напал ворог, так и мы (цисары о собі бесідують „мы”) — гварил цисар, — выілеме на фронт, штобы показати нашому народови, же мы с ним не лем в хвилях счастья, але и в моменті тяжкой недолі. Выідеме на перши лєнии фронта. Думаєме, же буде то фронт полночный. В каждом разі будеме там, где будут найтяжши бои, бо багнеме додати нашим воякам надіи и віры в побіду. Нехай нигде не судят, же згодиме ся на мир, котрый мал бы змінити наши стары границы.”

В дальшой бесіді цисар Абисынии заявил, же вірит в концову побіду абисынскоґо арміи, бо уважат абисынскоґо вояка за найотважнійшого в світі.

„Не бісудуєме тото прото, — додал цисар — же єст то наш вояк, але прото, же так єст на правду.”

Король королев вправят ся в метаню ручныма гранатами.

Цисар абисынскый єст добрым приміром для своих вояков. Каждого дня выізджат он самоходом до Губи, великого военного обоза под Аддис Абебом и лично участвує в стрілянню с армат, машинных и ручных карабинов и выкликує ентузіазм своима успіхами.

Цисар пробовал свои силы также в метаню ручныма гранатами, пак лично учил вояков уживати того оружия. Чорны воины оказали ся понятливыми учениками и осягають отдалєня на правду рекордовы.

Цисар приказал замовити ручны гранаты и выслати их на фронт. Также в Аддис Абебі має быти заложєна фабрика ручных гранатов.

Як мстят ся абисынчыкы за зраду.

Начальники племен, подлягаючи рас Самумови, забрали до неволі жены и діти тых вояков, котры разом с рас Гуксом зрадили Абисынию и перешли на сторону Италии и силом припровадили их перед италянскы позиции под Аксум, именно в тото місце, где полнят службу по стороні италянскоґо зрадничкы. Там, на очах италянскоґо войска и зрадничков приступлено до страшной масовой екзекуции.

Чорны воякы италянскы, хотячи ратовати свои мордованы родины, шмарили ся до атакы. Также и войска италянскы скочили до штурму на багнеты.

До боя не дошло, бо абисынчыкы по дополненю своей страшной мести, выцофали ся. Воякы италянскы нашли лем страшно покалічены тіла чорных жен и дітей. На дакотрых тілах были привязаны написи, же така судьба жеде всіх зрадничков цисара и отчизны.

Розстріл 6 шпьюнов

высших урядников абисынских.

В Аддис-Абебі арестовано 6-ох высших урядников абисынскоґо министерства военных справ с перед 5-ох літ. Арестованє послідовало рано, а уж по 4-ох годинах всіх розстріляно.

Оказало ся же были то италянскы шпьюны, котры продавали италянам всі оброблены генеральным штабом пляны абисынскоґо офензывы. Пляны тоты передавали через армянских купцов италянским агентам. Купцов-посередников не дало ся зловити, бо утекли они до французскоґо Сомали.



Италянскы жадања в Абисынии.

Бесідуює ся много о оконченю войны в Африці и о новых проєктах для мирных переговоров. По тым проєктам Италия жадає чотырох провинцій абисынских (Огаден, Гарар, Ауса и Тигре), штобы таким способом получить Ерытрею со Сомали, а решту Абисынии хоче отдати под протекторат Лигы Народов. Означало бы тото отрізанє Абисынии от світа и на тото не згодит ся ани Абисыния ани Лига Народов.



Вчийме ся от жен виленских.

Вывоз продуктов с воєводства виленскоґо росне с каждым роком. Поднес ся промысл зелярскый, што позволило вывезти с Виленскоґо 10.000 кг. лікарских зел за суму 20.000 зл. за границу до Франции, Бельгии, Швайцарии, Німеччины, Чехословакии, Австрии и Югославию, котры каждого року купуют от нас зєла. Понадто вывезено до самой Амерыкы 20.000 кг. грибов сушеных и 10.000 грибов марынованых, по котры приіхали нарочно купцы.

Як видно, населенє Виленскоґо, а особливо жены, радят собі добре, розвиваючи свой промысл, котрый приносить им добры заробкы.

Поза тым жены ведут там торговлю полотном и льняныма продуктами, великыма успіхами тішат ся литовскы сыры и копченє мясо. Всьо тото продають посредством кооператывов. А може бы так и у нас взяти ся за такую роботу? А но, попробуйте наши жены!



„Стыгматычка“ с Млинов

под обсервациом в львовском шпиталі.

Перед парома неділями село Млины пов. Яворовскоґо стало ся місцем, до котрого сходили ся тысячны массы богомольцов, — хлопков, серед котрых рознесла ся вість о „чудах“ одной дівчины, котрой на руках, грудях и ногах появляють ся раны, подобны до ран Христовых. Часом одного дня приізджало до Млынов по 2 и больше тысяч людей.

Штобы положити тому конец, „стыгматычку“ перевезено до Львова до шпитала, где бадають ю лікары. Дотеперешны бадања выказали, же Настя Волошин єст совсем нормальна, розважна и интеллигентна, а раны на руках и ногах, персах походять от задрапаня. Жадного кырвавляня и ропления ран не спостережено.

Не попадат она также в жаден надземельный транс и не зраджат жадных цїх психопатычных.



Борба с хробацтвом.

Найлучшим-способом нищеня хробацтва єст удержанє дому в чистоті, если однак в послідство занедбаня появили ся в хыжі блощицы и блохы, або иншого рода хробацтво, то борбу с ним треба начати безотложно. Тепло в часі літном єст причином, же особенно блощицы и блохы множат ся в осени с застрашаючом скоростью.

Борба с нима не єст трудна и можна их легко вынищити.

Заблощичене помешканє и граты треба передовсем добре очистити, дыры в стінах намазати перком мачаным в оцтовой есенции, або неочищеной терпентыні, а пак заліпити их папком, зробленом с гипсу и воды, або глином.

Выреперованы стіны побілити (добре єст до вапна додати быдлячу жолч). Стіны деревяны чистят ся труднійше, треба вшиткы шпары добре вышпыцовати оцтовом есенциом (уважати жебы не прыснути до очей). До шпыцованя найлучше купити шпырку в аптеці. На блощицы єст добрый также т. зв. флит. Также постель, рамы от образов, полочки и т. д. треба вымыти и вышпыцовати есенциом оцтовом, або неочищеном терпентыном. Стару солому вышмарити, сінники выпрати. Дылины вымыти лугом и горячом водом. Всі шпары и дыры вычистити и заліпити. Пак удержати помешканє як найчистійше, то не буде в нем ниякого хробацтва.



Грудя у коней.

Способ ліченя.

Груда повстає jako послідство подражненя скоры болотом, дожджом и т. д., причом в потрискану скору достают ся віроятно бактерии, выкликуючи тоту хвороту. Коні достают груду найчастійше в осени и в зимі, в часі студени и слоты. С той причины треба тепер пильно уважати на ноги коня и держати их чисто.

Перебіг груды єст слідующий. Найперше скоро в путах стає ся червена и горяча, творят ся малы пырщыкы, притом выділює ся скоро засыхаюча клеиста теч. Скоро постепенно стає ся штотаз твердша и тріскат, а пак творят ся глубоковы раны. Если груду занедбати, то росширять ся она на цілу ногу, конь не може ходити, аж наконец може згинути в послідство загальноґо закаженя.

Груду можна выгоити. Коня треба поставити на сухых дылинах, ногу старанно вымыти теплом водом (без мыла, або с мылом глицерыновым), осушити и погодивше вымыти спиртом змішаным с оливом (2 части спирта и 1 часть оливы). Если скоро в путах єст лем зачервенєна, то по осушеню треба втерати цынкуву масть, ногу завинуты газом и овязати. Если сут уж раны, то по вымытю ноги водом и спиртом с оливом, треба натерати мішанином глицерыны с пиоктанином (на 10 частей глицерыны дає ся 1 часть пиоктанины). По намазаню ногу овинути газом, пак окрутити ватом и овязати. Так робити каждого дня, покля нога не выгоит ся цілковито, причом при сліду-

ючих бандажах не треба ногу зливати водом лем спиртом с оливом. (Мішанину тоту треба перед ужитєм потрясти, бо спирт не лучит ся с оливом. Глицерину с пиоктанином треба перед каждым ужитєм добре вымішати.

Если хворота єст занедбана, то гоит ся нога барз долго. Тому тыж лучше запобігати хвороті через чисте и сухе удержанє ног у коня. Особенно треба уважати на тото в осени, коли коні цілыма місяцями маюют заболочены ноги. Обмытє болота и высушенє вогы не заберат дуже часу, а хоронит от хвороты, котрой гоинє потягат значны выдаткы.



РОБОТЫ НАД УРЕГУЛЬОВАНЄМ МОЛОЧАРСТВА.

Дня 17. жолтня т. р. отбыла ся в Министерстві Рольництва и Реформ Рольных конференция в справах молочарских при участии представителей Рольных Палат, молочных организации и кооперативных центральных торговых польских, русских и немецких.

На конференции обговорено работы Палат Рольных и кооперативных организаций над усталенєм сітей молочарских заведень и роспродаженєм кредитов инвестиционных.

Поза тым призадумано ся над поправками до проєктowanego Министерством закона о правах молочарских.

Конференция односторонне высказала ся за упомянутым проєктом, уважаючи, же введенє єго с огляду интересов рольництва єст доконче потребне.



ЗАРОБОК ДЛЯ ОКОНЧИВШИХ ТРЯКОТАРСКИЙ КУРС.

Всі тоты, котры окончили в прошлом року трякотарский курс и курс фарбованя волны, могут найти в часі зимы добрый заробок через плетенє нартярских рукавиц и пончо.

На нартярскы рукавицы и пончоходы достал Лемко-Союз замовленє, але не може заключити умовы, бо не знає кто и килько пар згодит ся их в зимі выплести. Тому звертаме ся до всіх тых, котры кончили трякотарский курс, не лем в Крыниці, але и в других місцевостях, штобы они донесли редакции „Лемко“ в Крыниці, килько пар може каждый при помочи родины в часі зимы выплести.

Волну потребну на выробы могут курсанты достати в редакции Лемка за подписанием деклараций, же выробы с той волны отдадут до продажи тойже редакции. По выробленю и продажи пончо и рукавиц редакция потрутит за ціну волны, а решту выплатит роботникам. Можно также волну купити.

В виду того, же в зимі марнує ся все много часу и же при такой роботі могут помагати всі домашны, аж и діти, єст тот заробок добрый и явят ся реальным результатом побераной на курсах науки.

В том році в грудні уряджат ся также курс ткацкий, котрый даст курсантам заробок зараз по оконченю курса.

Прото звертаме ся до всіх, вписуйте ся численно для власного добра на той курс. Часы сут такы, же треба выкорыстати каж-

ду случайность и каждый заробок, бо рук и губ нам прибиват, а грунтов єст так, як было, — всіх нас он не выкормит и треба оглядати ся за другим варстатом труда.



УКРАИНЦЫ БОЯТ СЯ ПОБІДЫ АБИСЫНИИ.

Ундовске „Діло“ признало за потребне заняти позицию в виду Абисынии и именно тото, же симпатии украинцев сут по стороні Абисынии, не подобат ся „Ділу“. Правда, пише Діло, абисынцы борют ся за тоты самы принципы и права, якы визнают украинцы, але што-ж, коли в случаю побіды Абисынии програват войну Италия, котрой програна выходит на користь социяльно-коммунистического фронта, што вскрипило бы совіты и ослабило Німеччину.



ЯК БУДОВАЛ ГЕТМАН СКОРОПАДСКИЙ УКРАИНУ.

В Лондоні отбыла ся судова росправа против агентови гетмана Скоропадского, англикови Туфнелюви, кстрого Скоропадский заскаржил же Туфнель присвоил собі гроши, якы одержая на украинскы ціли. В часі росправы выявили ся скандальны кулисы акции Скоропадского и єго представителя Коростовца, котры забрали 12 тысяч фунтов стерлингов (312 тысяч зл.) нибы на „освобожденє“ Украины, прирекаючи за тото ріжны концесии на Україні. В часі росправы выявило ся, же 7.500 фунтов стерлингов, выданых нибы на пропаганду, Скоропадский выдал на свои власны ціли и то дыскретной натуры. Крім того Скоропадский пожичил для себе 730 фунтов стерл., а Коростовец взял пожичку в высоті 1487 фунтов. Туфнель заповіл, же открьє цілый ряд злоупотреблень Скоропадского и Коростовца и Скоропадский в обаві компромитации выцофал скаргу против Туфнелюви и мают ся погодити.

ПОМІЩАЙТЕ
ОГОЛОШЕНЯ
В ГАЗЕТІ „ЛЕМКО“

КТО ХОЧЕ ЗАБЕЗПЕЧИТИ СЯ
НА СТАРОСТЬ, АБО ЗЛОЖИТИ ДІТЯМ
ПРИДАМЕ, НАЙ
ЗААСЕКУРУЄ СЯ

в Асек. Товаристві

Вита и Краковске

во ЛЬВОВІ

ДОЛЯ СВЯЩЕННИКОВ В СОВІТАХ.

Газета „Русское Слово“ доносит, же в советских концентранцийных обозах померло дотепер 67 епископов и 1850 священников, котрых поубивали чекисты.

От часу опанованя Росии через большевиков арестовано 2000 епископов и 27.000 священников. Крім того закрыто 28.935 церквей и монастырей, котры замінено на кинотеатры и музеи.



Загальне рочне собрание членов чит. М. Качкочского в Квятони

отбуде ся в неділю дня 17. листопада 1935. о год. 2-ой пополудни в домі

Ивана Прусака

со слідуючом програмом:

- 1) Открытє собрания и выбор президии.
- 2) Отчитанє протокола с послідного загального собрания.
- 3) Отчет о діяльности Выділа за послідный рок.
- 4) Уділенє абсолютории уступаючому выділу.
- 5) Выбор нового выділа и ревизийной комиссии.
- 6) Внесєня членов.


Кому дороге руске имя, просиме взяти участь в нашем собранию.

За выділ читальні:

Е. Цымбала
предсідатель.

ПОЧТОВЫЙ ЯЩИК.

В ділі журналу „Лукошко“ не можу нич отвітити. Редакция помістила своєго часу прислане обявленє, же має виходити журнал „Лукошко“, але сама не бере за обявленя ниякой отвітственности. Редакция не знає, ци такый журнал ище виходит. Найлучше буде звернути ся просто до редакции журналу „Лукошко“.



Што чути в світі.

Відень: В звязи с поголосками о наміренню Німеччини вернути до Лиги Народов, правительство німецьке поинформовало други державы, же Германия верне до Женевы лем втотчас, як буде уневажненый трактат версальский и вернут Німеччині колонии.

С Атен доносят, же на Креті выбухла знова революция. На приказ премиєра Кондылиса, котрый, як відомо, до часу поворота короля Юрия полнит уряд вице-короля, выслано для здавленя революции 3 контр-торпедовцы с 2'000 вояков.

Силы революционероу обчисляют на 30 тысяч людей, котры маот быти добре вооружены и заняли всі стратегичны точки острова.

Недалеко Токио (Япония) завезла ся гора и перевернул ся поїзд, 11 людей убило ся, а 50-теро єст тяжко раненых.

В Акаизи (Япония) в копальнях угля наступила експлозия. Дотепер выдobyто 42 трупы. В подземельных корытарах находить ся кромі того килькадесят горников, засыпанных земльом.

В Вейшеу (Кытай) розляло ся озеро и за-topило 200 сел.

По результатам бадань москєвского инстytutа научного для бадань мозга, як вага, так и розмір мозга не маот нич общого с интеллигенциом у людей. Совітскы учены твердят, же люды о незвычайно малом мозгу могут быти барс интеллигентны.

Рим. В костелі выставлено 27.X. трупну з тілом св. Винкентии на публичный вид, От горючої свічки запалило ся сукно и згоріло тіло святой.

Боливия внесла протест до Лиги Народов, в котром скаржит Парагвай, же помимо оконченя войны и заключеня мира, Парагвай задержал 15.000 военноплінных, котрых уживат до работ публичных.

В Итали оголошено декрет о введеню в жите договора италянско-австрийского о ввозі желіза и стали с Австри.

Япония творит нову републику монгольску Предсідатель Политычнoй Рады Внутренной Монголии, князь Юи и секретар той Рады проклямовали дня 30.X. независимость внутренной Монголии.

Король Греции, Юрий II. намірят приіхати до Греции на кораблі „Аверов” дня 17 листопада т. р.

Шанхай: В місті Лянчао в Кытаю вылетіл в воздух великий кытайский склад оружия, в котром находили ся великы припасы бомб и амуниции. В часі експлозии столб дыма и поломени доходил до 400 ме-

тров вгору. Убитых єст около 2,000. Праві цілый центр міста єст розвалены. Около 10.000 людей стратило дах над головою.

Недавно отнайдено місце, где находить ся затоплений в-часі світової войны англицкый корабель „Люзитания.“ Лежит он в Ирландском Морі в глубині 60 метрoв. Корабель тот затопила німецька подводна лодь. Был он свого часу одним с найбільших (41.000 тон) и вез на палубі скарб 15 миллионов долларoв в золоті до Америки. Втотчас утопило ся 900 людей.



Вісти с краю.

Варшава: Ухвалены через Лигу Народов санкции в виду Итали не даю Польщі права импорта италянского дугану, котрый до тепер спроваждал Монополь Табачный в количестве килькох миллионов кг. рочно.

Министерство Финансов приготвило уж табелю доходoвого податку от урядничих пенсий. От 100 зл. податок буде выносити 5 1/2%, от 101-150 — 7 1/2%, от 151-500 зл. — 10 1/2%, от 501-1000 зл. 12 1/2%, от 1001 до 2000 зл. — 15 1/2%, понад 2000 зл. — 20 1/2%.

Варшава: Проект амнистии переслало уж Мин. Правосудия Минист. Внутр. Діл и буде предложеный Сеймови на сесии грудневой. Политычны преступники засужены на полтора року, будут освобождены от кары, а засуженым на 2-3 літ обнижит ся кару до половины. Таксамо криминалистам дає ся кару до 1/2 року, а кару от 3 до 5 літ зменшат ся до половины.

Варшава: Дня 30.X, отбыло ся собранє предсідателей и управителей воеводских организаций Безпартийного Блюку Сотрудничества с Правительством (В. В. В. Р.), на котром предсідатель, Валерий Славек заявил, же в виду сполненя своего обовязка через организацию, ей сить организационна стає ся розвязана.

В Кракові кружат поголоскы, же воеводоу краковским має быти заименований б. маршал Сейма Д-р Казимір Свитальский.

Добре ся бавят. В часі забавы в читальні „Просвіты” в Чолганах пов. Долины, явил ся о полночи предсідатель той читальні о. Зубрицкий и зажадал от гостей, штобы ся росошли и перестали танцовати, на што отвітили єму сміхом и дрвинами. О. Зубрицкий розбил палицом лампу и повстала загальна битка, в часі котрой О. Зубрицкого сильно потурбовано.

Во Львові невысліджены преступники украли с головного складу Табачного Монополя 3 скрині містячи 90.000 штук цигареток „дамес” вартости 8.100. Полиция не выслідила ище крадежи.

Тяжко хвора Горгонова, жиюча в Фордоні в вязниці зажадала приїзда прокуратора, перед котрым хоче зложити важны показаня.

Министерство Комуникации оголосило обіжник, в силу котрого: за выскакованє и вскакованє с поїздов в бігу и за отверанє дверей поїздов в часі бігу платит ся кары 2 злоты. За продаванє товаров и за продукции музычны, а также за ізду без билета платит ся 5 зл. кары.

Рыбакы кашубскы предсказуют легку зиму, бо ноч перед св. Михалом была темна и без звїзд. Приповідка на Кашубах єст: як ноч ясна на Михала—то буде зима тревала.

В ЗИМІ ОТБУДЕ СЯ В КРЫНИЦІ СЕЛІ КУРС ТКАЦКЫЙ

Оплата за науку на курсі выносит 2 зл. Участники курсу не достаюот помещеня и удержаня. Курсанты мусят приготвити льняну, або волняну пряджу. Мусят они обовязати ся перестерігати рыгор школьный.

Зголошеня принимат администрация газеты Лемко в Крыниці.

Важне для читалень и аматорских кружков!

В КРЫНИЦІ-СЕЛІ ОТБУДЕ СЯ ДВО-МІСЯЧНЫЙ КУРС ДЫРЫГЕНТОВ ХОРОВ.

Курс начне ся 1. грудня т. р. и обийме теорию и практику потребну до веденя аматорских хоров. Буде учити ся также церковного співу.

Оплата за науку на курсі выносит 20 злотых. Курсанты с інших сел достанут помещенє, без удержаня. Удержанє мусит покрити сам курсант.

Кромі того устроює ся в том самом часі также

ВЫСШІЙ КУРС

для тых, котры уж в прошлом року окончили курс низший. Оплата за курс высший выносит 25 злотых.

Зголошеня принимат
г-н Александр Ропицкий в Крыниці Здрою
(дом г-на Александра Поглида)